



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Tribunál Distritál Baucau

12 Feveiru 2015

Tribunál Distritál Baucau aplika pena úniku tinan 13 fulan 6 prizaun ba arguidu krime omisídiu simples

Iha 11 Feveiru 2015, Tribunál Distritál Baucau prezide leitura sentensa no kondena arguidu Mateus Ximenes ho pena tinan 13 fulan 6 prizaun hosi pena tinan 16 ba leten ne'ebé antes ne'e ministériu públiku husu ba tribunál.

Tribunál prova katak arguidu komete krime omisídiu simples no destruisaun, subtrasaun, okultasaun ka profanasaun ba kadaver hasoru Valenti Hornai (matebian). Kazu ne'e akontese iha 27 Abril 2014, Distritu Lautem.

Tribunál akomula pena tinan 13 fulan 6 prizaun hosi krime omisídiu simples (tinan 13) no ba krime destruisaun, subtrasaun, okultasaun ka profanasaun ba kadaver kondena ho tinan 1 prizaun.

“JSMP hanoin katak desizaun ida ne'e bele sai hanesan lisaun ba comunidade enjeral, hodi bele evita violénsia hasoru ema seluk iha futuru, liu-liu hodi evita hatoman-an hasai ema seluk nia vida,” dehan Diretór Ezekutivu JSMP, Luis de Oliveira Sampaio.

Tribunál prova katak iha 27 Abril 2014 tuku 10:00 dader, arguidu diskuti malu ho lezadu tanba lezadu dun arguidu mak oho nia karau. Tanba ne'e, lezadu nervozu no foti katana taa arguidu maibé la kona. Nune'e arguidu foti alu ida no baku lezadu to'o katana monu. Wainhira lezadu nia katana monu, arguidu foti fali lezadu nia katana ne'e hodi taa dala ida iha lezadu nia kanuruk no dala ida iha kakorok nune'e rezulta lezadu mate kedas iha fatin akontesimentu. Arguidu kontinua foti tali kesi lezadu nia ain no dada ba hakohi subar iha to'os laran.

Konsidera katak krime omisídiu kontinua ass iha comunidade, JSMP enkoraza entidade relavantes sira atu halo atividade promosaun ba importânsia hosi ema hotu nia vida tuir artigu 29 Konst. RDTL). Iha alínea (1) artigu ne'e defini katak (1) labele viola ema ida nia vida, no alinea

(2) Estadu rekoñese no garante direitu ba vida. Tanba ne'e, hasai ema seluk nia vida ne'e konsidera hanesan krime ne'ebé sériu iha kontestu Timor-Leste.

JSMP prezume katak dalabarak komunidadade abitua uja meus violénsia hodi rezolve konfliktu iha sira nia sociedade tanba sira iha iha koñesimentu natoon kona-ba lei apikavel sira. Tanba ne'e importante atu iha mekanismu ruma hodi kontrola prátika hirak ne'e no evita violénsia ho forma oi-oin iha komunidadade.

Julgamentu leitura akordaun prejide hosi juis koleтиву ne'ebé representa hosi Dr. Afonso Carmona. Ministériu Públiku representa hosi Dr. Alfonso Lopez no arguidu hetan akompañamentu husi Dr. Juvinal Yanes hosi Defensória Publika.

Atu hetan informasaun kompleitu bele kontaktu ba:

Luis de Oliveira Sampaio
Diretór Eksekutif JSMP
Alamat e-mail: luis@jsmp.minihub.org
info@jsmp.minihub.org
Telefone:3323883 | 77295795